



**Selasa, 23 Nopember 2021**  
**Ogen: 1 Timotius 2: 9-10**



**Mehamat Dingen Mehuli**



**M**oria si mehamat dingen mehuli tahu-tuhu jadi kemalemen ate nandangi perbulangenna. Diberu si mehamat dingen mehuli banci jadi ndehara si isuraken enterem dilaki. Sekalak dilaki si enggo tutus atena erjabu, pasti daramina diberu si mehuli lagu langkahna dingen si banci mehamat man bana i bas rumah tanggana pagin. Mehamat e me perbahanen si ncidahkan kesabaren, patuh, teridah arah cara ngerana si manjar-anjar, sopan, lemah lembut dingen meteh orat selaku diberu. Mehuli e me ukur si nggit mengalah guna kiniulin nggeluh, nggit ngalemi dingen nggit erkorban guna kalak si deban. Jadi tahu kal, kita pe ngena ateta adina ibahan Dibata kita jadi ndehara si mehamat dingen mehuli.

Enterem diberu erpengakap maka kinijilen ayo ras daging si nomor sadana. Mbentar, mancung, mata sipit, alis mekapal, ermbulu mata kece anti badai, langsing, ras sidebana iakap si erbanca meriah ukur kalak si natap-natapsa (daya tarik man lawan jenis). E maka enterem nge Moria si mejingkat ku salon, tapi lupa ertoto dingen ku Gereja. Perukurena medoni. Sekalak artis Jennifer Lopez ngatakenca "kecantikan hanyalah kulit luar, yang sangat penting adalah adanya keseimbangan antara pikiran, tubuh dan jiwa." Bahkan ia sekalak artis si banci mpekena-kena dirina jadi sempurna secara penampilan mengakui bahwa keseimbangan pikiren, tubuh ras jiwa nge si pentingen asa penampilen.

Paulus erbahan suratna man Timotius, gelah iberitakenna uga penting diberu e mehamat dingen mehuli peruisna (ay. 9), sabap dilaki si erkemalangen man Dibata lanai bo mesunah tergoda i bas potongan baju si la payo. E sada si man kemelanken iakapna. Bagepe potongan buk pe sederhana, mehuli min perbahanenna *gelah tangkas teridah itandaina kepe Dibata (ay. 10).*

